

الدخان فالخبز فالأسلاك الشائكة

بقلم: أحمد سكري

عم بمش... بعدني عم بمشي... والمسافة للملجأ مش قصيرة أبداً، خاصة لما تركض وعامل الوقت مش لصالحك والخسارة بهالموضوع بالتحديد بعني حياة أو موت أو عالقل إصابة وممكن تكون إصابة شلل، يعني عاهة مستديمة. بعدنا ما حكينا عن المصير المجهول اللي ممكن الإنسان يقع فيه. المصير المجهول؟ لأ أبداً!

يمكن بهداك الوقت ما كنت عم بفكر اني ممكن أخسر البيت اللي ربيت فيه وعشت فيه طفولتي. وما كنت بتوقع انو بيوم من الأيام رح يصير هيك. بالزبط مثل ما كان جدي طالع ومش عارف ولا متوقع انو ترك قريته وما عاد يرجع يشوفها.

بس عم بتذكر مشهد تيم حسن؛ الأستاذ علي... مشهد الهروب من القرية بمسلسل التغريبة الفلسطينية... مشهد الهجرة الكبرى بين القرى.

كلمة... كلمة واحدة بس، ممكن توصف شعوري وشعور الشخصية بهداك الوقت: "خوف". هاي الكلمة بتعبر عن كل شي، أو بالأحرى درجات الخوف، لإنو أكيد خوف الأطفال للوصول للملجأ ممكن نسميه دعر بس خوف الرجل المسن إسمو حزن وخيبة وكسرة نفس... تماماً مثل ملامح وجه خالد تاجا بالتغريبة بنفس مشهد الهجرة.

أكيد جدي كان عم يهرب من قريته بفلسطين خايف من نفس الأسباب يللي أنا كنت هربان منها بالشام. كثير مرات بسمع من ختايرة كبار انو احنا كنا خايفين عالسنوان والولاد. بالزبط، احنا مش بس كنا هربانين من الموت، احنا كنا خايفين من الفوضى... الفوضى يللي بتطلع كل الوحوش الموجودة فينا وما فيها تطلع بالحالة الطبيعية.

فوضى بسبب صهاينة جايبين من خلف البحار خاف منها جدي ع نفسو وع عرضو، هي نفسها الفوضى يللي كانت عم بتركضني بسبب جاري اللي ساكن معي بالحي.

برجع بقول عن الحالة، ما بتتوصف إلا بكلمة واحدة: الخوف.

بلحظة، بعد مشاهد تلفزيونية كثيرة عن الي صار وعم يصير بسوريا، كانت مكبرات الصوت بالجوامع كفيلة بتعريفنا بالمسمى الحرفي لخراب البيت، يعني الطلعة من بيوتنا. بعد ساعة تحديداً بلش قصف ما معروف مصدره وجهته، فوضى وبس، ما فيك تتوقع وين الأمان. وبعد أربع ساعات، بلشت رحلة بما يسمى رحلة خراب البيت، صرنا نتنقل من بيت قرايب لبيت ثاني، لنلاقي مكان آمن بس للأسف كنت حس حالي بسيارة وأنا عم بروح لكل بيت وأخذ الناس لنطلع على هاي الرحلة، لانه كلنا اتجهنا وصرنا عم نركض لنحمي حالنا بالملجأ اللي كنا مفكرينه هو المكان الآمن، بس للأسف، ما كان في شي آمن. بس قبل ما أحكيلكم لي طلعنا من الملجأ لازم أحكي عن الطريق للملجأ، مشهد كأنه يوم القيامة من دعر وخوف بوجوه وعيون الناس، بس كل الكلمات والعبارات ما ممكن توصف المشهد، بتركض بس المسافة بعيدة بتركض بس انت بتحس حالك تقبييللل، تقيل بهمك وحزنك وخوفك وذعرك، تقيل بتفكيرك شو بعد رح يصير، تقيل لما تشوف مرة طالعة بلا حجاب ناسية حالها من خوفها، شو في أكبر من الموت؟ ولا شي!!

وأم عالطرف الثاني عم تصرخ أنا نسيت ابني بالبيت!

الأم اللي مستعدة تعطي ابنا الحياة وأيامها وكل شي معنوي أو مادي، بلحظة بتفق الإدراك وبتركض لتنجو بنفسها، بس بيلش يرجع وعيها بتقطن انو رضيعها مش معها بتصرخ بدي ابني جبولي ابني. هون مش محتاج كثير أدور بذاكرتي عن مشهد مشابه. أول شي خطرلي بس شفت المرا كان مشهد أم سالم كمان

بمسلسل التغريبة وخطر ببالي خلدون أيقونة الطفولة الضايعة بالنكبة. خلدون يللي قرر غسان كنفاني برواية عائد الى حيفا يتركو بالبيت بحيفا ويضيع ويصير اسمو دوف. بتذكر لما ستي شافت شخصية أم سالم صارت تبكي. تاري القصة صارت فعلاً أثناء النكبة ومع أكثر من أم؛ هربت وأخذت المخدّة بدل إبنها.

قال وأنا اللي كنت مفكر انو الدكتور وليد سيف (كاتب التغريبة الفلسطينية) وغسان كنفاني بحكم إنن متقفين وبدهن ينشروا قباحة المعاناة من جراء اللجوء فخلوا الرواية تدور حول حدث بشع ما بصير إلا بالخيال، بس طلع الواقع يا ستي مش كثير ييفرق عن الخيال.

الأم سنة 1948 وهي نفسها صفة يللي عالورق وهي نفسها أم سالم عشاشة التلفزيون وبي نفسها المرا يللي أنا شفتها بسوريا وقت كنت هربان وقاعد بالملجأ.

أب حامل ابنه عكتفه وعالكثف الثاني حامل هموم وأحزان، تذكر اللي كان يحكيلى اياه جده عن طلعتن من فلسطين. يمكن لإنو الأب هو دائماً يللي بيحمي البيت بحس بالخطر أكثر من أي فرد من أفراد الأسرة وبشوف يللي هنن ما بشوفوه. وأنا بنفس الوقت عم بتذكر كلام الكبار عن تهجيرن بال48 لكل هالمواقف الي ما كنت بتخيلتها تصير معي شخصياً أبداً، يعني تجسد الخوف بدرجاته وأنواعه.

وصلنا للملجأ، كان مكان مشبع بالخوف مشبع بالذعر مشبع برائحة الموت اللي محاولطة الناس من كل جهة، قعدنا يومين، وبموجز بسيط للي كان موجود، أكل قليل، تدفئة ما في، وبوقت قررت أطلع أنا وشوية شباب نجيب خبز سمعنا انه انقص الفرن. بس بقصة الحاجة شيخة زيد الللي حضرتها بأرشيف النكبة، الموضوع كان مختلف شوي لأنو مش الفرن اللي انقص. الشباب يللي رجعت تجيب خبز هيبي يللي انقصت. في شاب اسمو طه، رجع يجيب خبز لأهله اللي هربانين على عين الحوش برا البلد بس شافوه طخوه دغري.

هذا في علم الحرب بسموه تمشيط. انك تدمر كل نقاط القوة البشرية المتبقية عند العدو المنهزم. والقوة او اللي الناس بالمجتمع القروي كانت مفكرتها قوة هي سواعد الرجال وبس. طيب الرجل الأعزل إلا من بارودة انكليزية شو بدو يعمل قدام هالعصابات المنظمة بأحدث الأسلحة والمدركات.

مهي شو قصة عين الحوش؟ قصتها انو الناس طلع بيناتهن خبر مثل ما بتقول الحجة شيخة¹: هجموا اليهود إطلعوا النسوان والولاد. سبحان الله هو نفس السيناريو وين ما كان، النسوان و الولاد. بتقول في واحد اسمو سعيد الحديري هزم مرتوع قرية الجش ورجع لعنا. مش مهم اذا هو بيتعرض لخطر المهم المرا العرض ما يتأذى.

تماماً مثل ما صار معي بس رحى أجيب خبز لأهلي بالملجأ. يمكن لو سبقت شوي كنت رحى بس انقص الفرن. يعني فعلاً ألطاف ربنا كانت متجلية جدا بكل مكان رغم كل شي كان عم يصير.

يمكن لإننا منعتبر الحفاظ على الحياة غنيمة، مش مهم أي حياة، حياة اللجوء، النزوح، المخيمات، المهم نجينا أرواحنا. هيك منكون بخير أو هيك منتخيل.

المهم... انتهزنا فرصة هدوء إطلاق النار وقدرنا نطلع من المنطقة، وفجأه لقينا حالنا على الحدود الأردنية من دون أي تخطيط مسبق وحاولنا نفوت على الاردن لأنه كنا بحالة حرب ما كنا متوقعين أو متخيلين انه يمنعوننا نفوت. قعدنا حوالي الخمسة أيام على الحدود، قعدنا حوالي خمس ايام بلياليهن على الحدود بالبرد والجوع، كل ما كنا نفوت على الحدود يحطونا بباص ويسكروا علينا ويرجعونا ليرات الحدود بحج' انه احنا فلسطينية سورية وما لنا حق اللجوء لدولة ثانية. تعذبنا كثير واحنا قاعدين على الحدود، بلحظه من اللحظات شفت بسه قطعت الحدود وفاتت، قلت معقول صار الحيوان عنده حقوق أكثر من بني آدم؟! وبعد ما ياسنا من دخول الأردن قررنا انه نرجع بس بوقتها ما قدرنا نفكر بالرجوع للبيت لانه بطل في بيت قررنا نرجع للبنان، نفس

شيخة إسماعيل زيد , مواليد 1926, الظاهرية-صافد-فلسطين , أرشيف النكبة 1

العملية والعذاب تكرر، إلا انه هي المره فتننا وقطعنا الحدود اللبنانية. دخلنا على لبنان وهون بلشت رحله عذاب ومعاناة جديدة على عكس ما كنا مفكرين انه رح نرتاح بعيداً عن الدمار والقصف والدم والحرب والتفجيرات. بعدنا عم نحكي عن يلي خسناه عن كيف هربنا وعن كثير شغلات وأهم شي عن المصير المجهول. لإنو الواقع كان أكثر ألم وتعقيد للفلسطيني اللي لجا للبنان من يلي إله عمر عايش هون. هههه، بتضحك هالمسميات فلسطيني سوري... فلسطيني لبناني، المهم ما في فلسطيني سادة. الفلسطيني اللبناني إلو إمتيازات شوي شوي ها أكثر من الفلسطيني السوري اللي مثل حالاتنا. وكأنه اللجوء فيو تلت نجوم وأربع نجوم ويا ستي خمس نجوم، بس اللي بعرفو ومتأكد منو إنو النجوم بالنسبة لأي فلسطيني هي علامات معلمة بجسمه وذاكرتو عن كل مرحلة من مراحل نكبته المستمرة.

المراجع:

مقابلة مع شيخة زيد